

2011 թվականի հունվար-մայիս ամիսներին ՀՀ պետական բյուջեի կատարման ամփոփ բնութագիրը¹

2011 թվականի հունվար-մայիս ամիսների ընթացքում ՀՀ պետական բյուջեի եկամուտները կազմել են 325.7 մլրդ դրամ, իսկ ծախսերը՝ 332.4 մլրդ դրամ, որոնք համապատասխանաբար 81%-ով և 72.5%-ով ապահովել են ՀՀ կառավարության առաջին կիսամյակի ծրագրային ցուցանիշների կատարումը: Պետական բյուջեի տարեկան ծրագրային ցուցանիշները կատարվել են եկամուտների գծով՝ 38.7%-ով, ծախսերի գծով՝ 35.4%-ով:

ՀՀ պետական բյուջեի եկամուտները

Նախորդ տարվա նույն ժամանակահատվածի համեմատ պետական բյուջեի եկամուտներն աճել են 8.9%-ով կամ 26.6 մլրդ դրամով, որն ապահովվել է հարկերի, պետական տուրքերի և պարտադիր սոցիալական ապահովության վճարների հաշվին, որոնք 10.5%-ով (29.3 մլրդ դրամով) գերազանցել են նախորդ տարվա նույն ցուցանիշը: Հաշվետու ժամանակահատվածում այլ եկամուտները նվազել են 9%-ով (1.6 մլրդ դրամով), իսկ արտաքին աղբյուրներից ստացվել են ընդամենը 227 մլն դրամ պաշտոնական դրամաշնորհներ՝ նախորդ տարվա 1.4 մլրդ դրամի դիմաց:

Պետական բյուջեի եկամուտների 95%-ը ձևավորվել է հարկային եկամուտների, պետական տուրքերի և պարտադիր սոցիալական ապահովության վճարների, 5%-ը՝ այլ եկամուտների, 0.1%-ը՝ պաշտոնական դրամաշնորհների հաշվին: «Հայաստանի Հանրապետության 2011 թվականի պետական բյուջեի մասին» ՀՀ օրենքի 9-րդ հոդվածի 11-րդ կետին համապատասխան պետական բյուջեում ներառվել են նաև պետական հիմնարկների արտաբյուջետային ֆոնդերի միջոցները, որոնց եկամուտները հաշվետու ժամանակահատվածում կազմել են 7.2 մլրդ դրամ կամ առաջին կիսամյակում ծրագրված մուտքերի 73.1%-ը:

2011 թվականի հունվար-մայիս ամիսների ընթացքում ՀՀ պետական բյուջե են մուտքագրվել 258.6 մլրդ դրամ հարկային եկամուտներ ու պետական տուրքեր, որոնք

¹ Պետական բյուջեի եկամուտներում, ծախսերում և պակասուրդի ֆինանսավորման աղբյուրներում ներառված չեն արտաքին աղբյուրներից ֆինանսավորվող նպատակային ծրագրեր իրականացնող գրասենյակներով շրջանառվող միջոցները:

կազմել են կիսամյակային ծրագրի 82.1%-ը: 2010 թվականի նույն ժամանակահատվածի համեմատ նշված եկամուտներն աճել են 10.2%-ով կամ 23.9 մլրդ դրամով: Հարկային եկամուտների աճը հիմնականում պայմանավորված է ավելացված արժեքի հարկի, շահութահարկի, եկամտահարկի և այլ հարկերի աճով:

Հարկերի և տուրքերի 48.3%-ն ապահովվել է ավելացված արժեքի հարկի հաշվին, որը կազմել է 124.8 մլրդ դրամ և 8.1%-ով կամ 9.4 մլրդ դրամով գերազանցել նախորդ տարվա նույն ցուցանիշը: ԱԱՀ-ի մուտքերից 77.1 մլրդ դրամը ստացվել է ՀՀ սահմանին հարկումից, 47.7 մլրդ դրամը՝ ներքին շրջանառությունից, ընդ որում, եկամուտների աճն ապահովվել է գերազանցապես ներքին շրջանառությունից ստացված մուտքերի հաշվին:

Պետական բյուջեի հարկային եկամուտների ու պետական տուրքերի 5.6%-ն ապահովվել է ակցիզային հարկի հաշվին՝ կազմելով 14.6 մլրդ դրամ: Մասնավորապես՝ հանրապետություն ներմուծվող ենթակազմային ապրանքների հարկումից ստացվել է 9.8 մլրդ դրամ, հանրապետությունում արտադրվող ենթակազմային ապրանքների հարկումից՝ 4.8 մլրդ դրամ:

Հաշվետու ժամանակահատվածում ՀՀ պետական բյուջեի հարկային եկամուտների 17.5%-ն ապահովվել է շահութահարկի հաշվին՝ կազմելով 45.3 մլրդ դրամ: Նախորդ տարվա նույն ժամանակահատվածի համեմատ շահութահարկի մուտքերն աճել են 19.5%-ով կամ 7.4 մլրդ դրամով:

Հաշվետու ժամանակահատվածում ՀՀ պետական բյուջե է մուտքագրվել 31.1 մլրդ դրամ եկամտահարկ՝ ապահովվելով հարկերի և տուրքերի 12%-ը: Նախորդ տարվա նույն ժամանակահատվածի համեմատ եկամտահարկի մուտքերն աճել են 10.1%-ով կամ 2.9 մլրդ դրամով:

Մաքսատուրքի գծով մուտքերը կազմել են ավելի քան 14 մլրդ դրամ կամ հարկերի և տուրքերի 5.4%-ը՝ 10.9%-ով գերազանցելով 2010 թվականի համապատասխան ցուցանիշը:

2011 թվականի հունվար-մայիս ամիսների ընթացքում պետական բյուջե են մուտքագրվել շուրջ 7.7 մլրդ դրամ պետական տուրքեր՝ կազմելով կիսամյակային ծրագրի 78.9%-ը: Նախորդ տարվա նույն ժամանակահատվածի համեմատ նշված մուտքերն աճել են 15.3%-ով կամ 1 մլրդ դրամով:

Հաշվետու ժամանակահատվածում գործունեության առանձին տեսակներից գանձվել են ավելի քան 8.3 մլրդ դրամ հաստատագրված վճարներ՝ ապահովվելով հարկային

եկամուտների ու պետական տուրքերի 3.2%-ը: Նշված ցուցանիշը նախորդ տարվա նույն ժամանակահատվածի համեմատ նվազել է 5.7%-ով, ինչը հիմնականում պայմանավորված է գործունեության որոշ տեսակների՝ հարկման ընդհանուր դաշտ անցնելու հանգամանքով:

2011 թվականի հունվար-մայիս ամիսների ընթացքում ՀՀ պետական բյուջե են մուտքագրվել շուրջ 4.9 մլրդ դրամ բնօգտագործման և բնապահպանական վճարներ, որոնք նախորդ տարվա նույն ժամանակահատվածի համեմատ ավելացել են 53.3%-ով կամ 1.7 մլրդ դրամով՝ հիմնականում պայմանավորված օգտակար հանածոների արդյունահանման և այլ պետություններում գրանցված տրանսպորտային միջոցներից օդային ավազան վնասակար նյութեր արտանետելու համար գանձվող վճարների աճով:

Հաշվետու ժամանակահատվածում պետական բյուջե են մուտքագրվել 7.8 մլրդ դրամի այլ հարկեր: Մասնավորապես՝ շուրջ 3 մլրդ դրամ է կազմել «Կոնցեսիայի մասին» ՀՀ օրենքով սահմանված ռոյալթին, 1.6 մլրդ դրամ՝ ռադիոհաճախականության օգտագործման թույլտվության տրամադրման (գործողության ժամկետի երկարաձգման) վճարները, 1.1 մլրդ դրամ՝ ճանապարհային վճարները, 628.2 մլն դրամ՝ հարկային օրենսդրության խախտման համար «Հարկերի մասին» ՀՀ օրենքով սահմանված տուգանքները, 570 մլն դրամ՝ ԱՏԳԱԱ 2208 ապրանքային ծածկագրին դասվող օղու ներմուծման թույլտվության համար սակագնային քվոտայի վճարը, 211.5 մլն դրամ՝ հանրային ծառայությունների կարգավորման պարտադիր վճարները, 185.1 մլն դրամ՝ կոնցեսիոն վճարը, շուրջ 19 մլն դրամ՝ արտոնագրային վճարները և 606.4 մլն դրամ՝ ՀՀ կառավարությանն առընթեր պետական եկամուտների կոմիտեի նյութական խրախուսման ֆոնդի եկամուտները: Նախորդ տարվա նույն ժամանակահատվածի համեմատ այլ հարկերի փաստացի ցուցանիշն աճել է 70.8%-ով կամ 3.3 մլրդ դրամով, ինչը հիմնականում պայմանավորված է ռոյալթիի և ռադիոհաճախականության օգտագործման թույլտվության տրամադրման վճարների աճով:

Պարտադիր սոցիալական ապահովության վճարների գծով բյուջետային եկամուտները կազմել են շուրջ 50.7 մլրդ դրամ՝ 84.4%-ով ապահովելով կիսամյակային ծրագրով կանխատեսված ցուցանիշը: 2010 թվականի նույն ժամանակահատվածի համեմատ պարտադիր սոցիալական ապահովության վճարներն աճել են 12%-ով կամ 5.4 մլրդ դրամով:

2011 թվականի հունվար-մայիս ամիսների ընթացքում դրամաշնորհային ծրագրերի շրջանակներում շուրջ 227 մլն դրամ է մուտքագրվել հիմնարկների արտաբյուջետային հաշիվներին՝ կազմելով կիսամյակի ծրագրով նախատեսվածի 23.3%-ը: Հաշվետու

Ժամանակահատվածում Եվրամիությունից նախատեսվել էր ստանալ շուրջ 7 մլրդ դրամ դրամաշնորհ՝ ընդհանուր բյուջետային աջակցության ծրագրի շրջանակներում, որը, սակայն, չի ստացվել: Արդյունքում դրամաշնորհների կատարողականի ցուցանիշը կազմել է ընդամենը 2.8%:

2011 թվականի հունվար-մայիս ամիսներին ՀՀ պետական բյուջեի այլ եկամուտները կազմել են ավելի քան 16.2 մլրդ դրամ՝ 85.1%-ով ապահովվելով առաջին կիսամյակի ծրագրային ցուցանիշը: Նշված գումարից շուրջ 6.4 մլրդ դրամը կազմել են ՀՀ պետական հիմնարկների արտաբյուջետային եկամուտները, որոնց ծրագիրը կատարվել է 81.7%-ով: Այլ եկամուտների ծրագրի կատարումը հիմնականում ապահովվել է ՀՀ կառավարությանն առընթեր անշարժ գույքի կադաստրի պետական կոմիտեի ծախսերի նկատմամբ եկամուտների գերազանցումից մուտքերի, բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվող տոկոսավճարների և ոչ ռեզիդենտներին տրամադրված վարկերի օգտագործման դիմաց վճարվող տոկոսավճարների հաշվին, որոնք գերազանցել են առաջին կիսամյակի ծրագրային ցուցանիշները համապատասխանաբար 60.1, 19.7 և 1.5 տոկոսով: Ի տարբերություն նշված եկամտատեսակների, որոշ եկամուտների գծով արձանագրվել են համեմատաբար ցածր ցուցանիշներ: Մասնավորապես՝ իրավաբանական անձանց կապիտալում կատարված ներդրումներից ստացվող շահաբաժինների ծրագիրը կատարվել է 18.2%-ով, տիրազուրկ, ժառանգության իրավունքով, ինչպես նաև ֆիզիկական և իրավաբանական անձանցից (բացառությամբ ՀՀ համայնքների, միջազգային կազմակերպությունների, օտարերկրյա պետությունների) նվիրատվության կարգով պետությանը որպես սեփականություն անցած դրամական միջոցներից մուտքերի ծրագիրը՝ 28.5%-ով, ռեզիդենտներին տրամադրված վարկերի օգտագործման դիմաց վճարվող տոկոսավճարների ծրագիրը՝ 34.5%-ով: Հաշվետու ժամանակահատվածում ավելի քան 2.3 մլրդ դրամ է մուտքագրվել պետական բյուջե իրավախախտումների համար կիրառվող պատժամիջոցներից՝ կազմելով առաջին կիսամյակի ծրագրով կանխատեսված ցուցանիշի 77.1%-ը: Շուրջ 9.6 մլրդ դրամ են կազմել օրենքով և այլ իրավական ակտերով սահմանված պետական բյուջե մուտքագրվող այլ եկամուտները՝ ապահովելով առաջին կիսամյակի ծրագրի 92.8%-ը: Նախորդ տարվա նույն ժամանակահատվածի համեմատ նշված մուտքերի աճը կազմել է 30.8%: 2010 թվականի նույն ժամանակահատվածի համեմատ այլ

եկամուտները նվազել են 9%-ով կամ 1.6 մլրդ դրամով, ինչը հիմնականում պայմանավորված է բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվող տոկոսավճարների նվազմամբ:

ՀՀ պետական բյուջեի ծախսերը

2011 թվականի հունվար-մայիս ամիսների ընթացքում ՀՀ պետական բյուջեի միջոցների հաշվին կատարվել են 332.4 մլրդ դրամի ծախսեր՝ կազմելով կիսամյակային ծրագրի 72.5%-ը: Մասնավորապես՝ 304 մլրդ դրամ են կազմել ընթացիկ ծախսերը, 28.3 մլրդ դրամ՝ ոչ ֆինանսական ակտիվների հետ գործառնությունները: Հաշվետու ժամանակահատվածում 5.1 մլրդ դրամի ծախսեր են կատարվել պետական հիմնարկների արտաբյուջետային միջոցների հաշվին՝ կազմելով ծրագրվածի 37.4%-ը: 2010 թվականի նույն ժամանակահատվածի համեմատ պետական բյուջեի ծախսերն աճել են 7.2%-ով կամ 22.4 մլրդ դրամով, ինչը հիմնականում պայմանավորված է կենսաթոշակների, պայմանագրային ծառայությունների ձեռքբերման, պետական պարտքի սպասարկման, հիմնական միջոցների, դրամաշնորհների և այլ ծախսերի աճով:

Ընթացիկ ծախսերը հաշվետու ժամանակահատվածում կազմել են 304 մլրդ դրամ՝ 74.2%-ով կատարելով կիսամյակային ծրագիրը: Նախորդ տարվա համեմատ դրանք աճել են 6.8%-ով կամ 19.3 մլրդ դրամով: Ընթացիկ ծախսերից 28.4 մլրդ դրամ տրամադրվել է պետական հիմնարկների աշխատողների աշխատավարձերի վճարմանը, շուրջ 2 մլրդ դրամ՝ պարտադիր սոցիալական ապահովության վճարներին, որոնք կազմել են կիսամյակային ծրագրի համապատասխանաբար 77.9%-ը և 71.9%-ը: Նախորդ տարվա հունվար-մայիս ամիսների համեմատ նշված ծախսերն աճել են համապատասխանաբար 5.5%-ով և 6.2%-ով: Ծառայությունների և ապրանքների ձեռքբերման նպատակով պետական բյուջեից օգտագործվել է 58.4 մլրդ դրամ, որը կազմել է կիսամյակային ծրագրի 71.8%-ը և 7.1%-ով գերազանցել նախորդ տարվա համապատասխան ցուցանիշը: Հաշվետու ժամանակահատվածում 13.1 մլրդ դրամ հատկացվել է պետական պարտքի սպասարկմանը՝ կազմելով ծրագրի 63.9%-ը: Մասնավորապես՝ նշված գումարից 9.7 մլրդ դրամը տրամադրվել է ներքին, 3.4 մլրդ դրամը՝ արտաքին պարտքի սպասարկմանը: Պետական պարտքի սպասարկման ծախսերը 29%-ով գերազանցել են նախորդ տարվա նույն

ցուցանիշը, որը տեղի է ունեցել հիմնականում ներքին պետական պարտքի սպասարկման ծախսերի աճի հաշվին: Պետք է ընդգծել, որ գնաճի դեմ պայքարի շրջանակներում ֆինանսական շուկայում դիտարկվող տոկոսադրույքների ընդհանուր աճի միտումը գրեթե չի անդրադառնում պետական պարտատոմսերի եկամտաբերության վրա, քանի որ միջին և երկարաժամկետ առումներով դրամական շուկայի մասնակիցների կողմից շարունակում են դիտարկվել որպես ներդրման ամենակայուն և հուսալի միջոց:

Անցած ժամանակահատվածում ՀՀ պետական բյուջեից տրամադրվել են 7.1 մլրդ դրամի սուբսիդիաներ՝ կազմելով կիսամյակային ծրագրի 75.6%-ը և պահպանվելով նախորդ տարվա մակարդակին:

36.3 մլրդ դրամ են կազմել պետական բյուջեից տրամադրված դրամաշնորհները, որից 35.5 մլրդ դրամը տրամադրվել է պետական հատվածի այլ մակարդակներին, 646.6 մլն դրամը՝ միջազգային կազմակերպություններին և 179 մլն դրամը՝ օտարերկրյա պետություններին: Մասնավորապես՝ համայնքների բյուջեներին տրամադրվել են 13.5 մլրդ դրամի դոտացիաներ, որոնք պահպանվել են նախորդ տարվա մակարդակին: Դրամաշնորհների կիսամյակային ծրագիրն ընդհանուր առմամբ կատարվել է 75.1%-ով, իսկ նախորդ տարվա համեմատ նշված ծախսերն աճել են 6.7%-ով:

2011 թվականի հունվար-մայիս ամիսների պետական բյուջեի ծախսերի 31.9%-ն ուղղվել է սոցիալական նպաստներին և կենսաթոշակներին, որոնք կազմել են 106.2 մլրդ դրամ՝ 78.1%-ով ապահովելով կիսամյակային ծրագրի կատարումը և 6.2%-ով գերազանցելով նախորդ տարվա նույն ցուցանիշը: Մասնավորապես՝ նշված գումարից 78.5 մլրդ դրամ (79.9%) են կազմել կենսաթոշակները, 27.7 մլրդ դրամ (73.2%)՝ նպաստները:

Հաշվետու ժամանակահատվածում պետական բյուջեի միջոցներից 52.7 մլրդ դրամ տրամադրվել է այլ ծախսերին՝ 70.4%-ով ապահովելով կիսամյակային ծրագրի կատարումը և 4.8%-ով գերազանցելով նախորդ տարվա նույն ցուցանիշը:

Պետական բյուջեի ոչ ֆինանսական ակտիվների հետ գործառնությունները հունվար-մայիս ժամանակահատվածում կազմել են 28.3 մլրդ դրամ կամ կիսամյակային ծրագրի 58.2%-ը: Մասնավորապես՝ 28.5 մլրդ դրամ են կազմել ոչ ֆինանսական ակտիվների գծով ծախսերը, որոնք կատարվել են 58.5%-ով: 172.6 մլն դրամ է մուտքագրվել ոչ ֆինանսական ակտիվների օտարումից՝ կիսամյակային ծրագրով նախատեսված 13.7 մլն դրամի և նախորդ տարվա նույն ժամանակահատվածի 545.7 մլն դրամի դիմաց: Նախորդ տարվա հունվար-

մայիս ամիսների համեմատ ոչ ֆինանսական ակտիվների հետ գործառնությունների ցուցանիշն աճել է 12.3%-ով՝ հիմնականում պայմանավորված շենքերի և շինությունների գծով կատարված ծախսերի աճով:

ՀՀ պետական բյուջեի պակասուրդը

2011 թվականի հունվար-մայիս ամիսներին ՀՀ պետական բյուջեն կատարվել է շուրջ 6.7 մլրդ դրամ պակասուրդով՝ նախատեսված 56.2 մլրդ դրամի դիմաց: Շեղումը հիմնականում պայմանավորված է նրանով, որ բյուջեի ազատ միջոցներից կիսամյակային ծրագրով նախատեսված 56.6 մլրդ դրամից օգտագործվել է ընդամենը 21.7 մլրդ դրամ և չեն ստացվել արտաքին աղբյուրներից նախատեսված 22.9 մլրդ դրամի վարկային միջոցները: Անցած ժամանակահատվածում ներքին աղբյուրների գծով պակասուրդի ֆինանսավորման ցուցանիշը կազմել է 26.1 մլրդ դրամ, իսկ արտաքին ֆինանսավորման գծով՝ -19.5 դրամ:

Պակասուրդի ֆինանսավորման ներքին աղբյուրներում շուրջ 5.4 մլրդ դրամ են կազմել փոխառու միջոցները, 20.8 մլրդ դրամ՝ ֆինանսական ակտիվները: Մասնավորապես՝ 6.1 մլրդ դրամ ստացվել է գանձապետական պարտատոմսերից: Մուրհակների մարման նպատակով կիսամյակային ծրագրով նախատեսված վճարումները կատարվել են 89.8%-ով: Այդ նպատակով պետական բյուջեից տրամադրվել է 19.7 մլն դրամ:

Հաշվետու ժամանակահատվածում ՀՀ ռեզիդենտներին պետական բյուջեից տրամադրվել են 2.5 մլրդ դրամի վարկեր (առաջին կիսամյակում ծրագրվածի 93.8%-ը), որից 1 մլրդ դրամը՝ Ռուսաստանի Դաշնության կողմից Հայաստանի Հանրապետությանը 2009 թվականին տրամադրված պետական վարկի միջոցներից տնտեսության կայունացման վարկավորման ծրագրի 1-ին բաղադրիչի ֆինանսավորման, 936.7 մլն դրամը՝ «Ներմուծում՝ ազատ շրջանառության համար» մաքսային ռեժիմով մարդատար տրանսպորտային միջոցներ ներմուծող ֆիզիկական անձանց, 467.4 մլն դրամը՝ «Հայաստանի փոքր և միջին ձեռնարկատիրության զարգացման ազգային կենտրոն» հիմնադրամի կողմից հիմնադրված վարկային կազմակերպությանը բյուջետային վարկեր տրամադրելու նպատակով: 50 մլն դրամ է տրամադրվել «ՍԻՍ-95» ՍՊԸ-ին՝ տեղական կենսապարարտանյութերի արտադրությունը խթանելու նպատակով: Շուրջ 1.6 մլրդ դրամ ստացվել է տրամադրված ներքին վարկերի վերադարձից՝ 12.4%-ով գերազանցելով առաջին

կիսամյակի ծրագրային ցուցանիշը: 716 մլն դրամ ուղղվել է «ՎՏԲ-Հայաստան» ՓԲԸ-ից ստացված վարկի մարմանը, որը կատարվել է առաջին կիսամյակում ծրագրված չափով:

Անցած ժամանակահատվածում պետական բյուջեի պակասուրդի արտաքին ֆինանսավորումը կազմել է -19.5 մլրդ դրամ, որից -3.1 մլրդ դրամը՝ փոխառու միջոցների, -16.4 մլրդ դրամը՝ ֆինանսական ակտիվների գծով: Նշված 3.1 մլրդ դրամն ուղղվել է արտաքին պարտավորությունների մարմանը, որից 1.8 մլրդ դրամը հատկացվել է Համաշխարհային բանկի աջակցությամբ իրականացվող ծրագրերի գծով պարտքի մարմանը: 572.2 մլն դրամ է տրամադրվել էլեկտրաէներգիայի հաղորդման և բաշխման համակարգի ծրագրի գծով Ճապոնիայի նկատմամբ պարտքի մարմանը, 412 մլն դրամ՝ ԱՄՆ ապրանքային վարկերի մարմանը, 51.9 մլն դրամ՝ ԳԶՄՀ, 115.8 մլն դրամ՝ ՎԶԵԲ, 59.7 մլն դրամը՝ ՕՊԵԿ-ի միջազգային զարգացման հիմնադրամի նկատմամբ ունեցած պարտքի մարմանը, 16.5 մլն դրամ՝ ԱԷԿ-ի վառելիքի չոր պահպանման համակարգի ծրագրի գծով Ֆրանսիայի նկատմամբ պարտքի մարմանը:

2011 թվականի հունվար-մայիս ամիսներին շուրջ 15.9 մլրդ դրամ տրամադրվել է ԼՂՀ-ին որպես միջպետական վարկ: Վրաստանի կողմից Հայաստանի նկատմամբ ունեցած վարկային պարտավորությունների գծով կատարվել է 120.9 մլն դրամի վճարում՝ առաջին կիսամյակում ծրագրված 124.9 մլն դրամի դիմաց: Ստացված գումարից 49.1 մլն դրամը նախորդ տարվա պարտավորությունն է և Վրաստանի կողմից փոխանցվել է 2010 թվականի դեկտեմբերին, սակայն գանձապետական միասնական հաշվին մուտքագրվել է ընթացիկ տարվա հունվար ամսին: Բաժնետոմսերի և կապիտալում այլ մասնակցության ձեռքբերմանն ուղղվել է 589.1 մլն դրամ՝ կազմելով կիսամյակային ծրագրի 99.8%-ը: Հաշվետու ժամանակահատվածում 46.5 մլն դրամով ավելացել է արտաքին աղբյուրներից ստացված արտաբյուջետային դրամաշնորհային միջոցների մնացորդը: